

Pitschna contribuziun al succurs d'enviern, grond effect cunter la povradad

■ (cc) Dapi 81 onns èsi pussaivel – grazia al Succurs svizzer d'enviern – da sustegnair durant tut l'onn umans che vivan en il Grischun ed en tut la Svizra sin il cunfin a la povradad. L'onn passà han er en il Grischun var 250 personas basegnusas stuì dumandar l'agid da l'organisaziun. Sut la direcziun dal president central ed anteriur cusseglier federal *Samuel Schmid* ha dacurt gi lieu a Cuira la radunanza da delegadas e delegads dal Succurs svizzer d'enviern. La povradad n'è betg adina evidenta. En Svizra valan quellas personas sco povras che han memia paucs meds finanziaals per pudair manar ina vita integrada socialmain. Lattiers tutgan en tut la Svizra 27 000 personas ch'èn vegnidas sustegnidas l'onn passà dal Succurs svizzer d'enviern.

L'agid naziunal è dumandà fitg

Er tar il Succurs d'enviern dal Grischun vegnan elavuradas onn per onn lunsch sur 200 dumondas da sustegn. La presidenta da la regenza *Barbara Janom Steiner*, commembra dal cussegl da la fundaziun Succurs d'enviern dal Grischun, è persvasa che gia ina pitschna contribuziun finanziaala d'in pèr tschient francs po stgaffir avunda spazi d'agir per ina famiglia u per ina persuna che viva suletta, uschia ch'ella po puspè dumagnar ses mintgadi en moda autonoma e senza quitads finanziaals. Circa dus terzs da las dumondas da sustegn en il Grischun per-

tutgan famiglias u personas ch'educeschan sulettas e lur uffants.

Il succurs d'enviern dovra vinavant sustegn

Il Succurs svizzer d'enviern sustegna ils succurs chantunals d'enviern cun ser-

vetschs sco er cun contribuziuns finanziaals, ma er materialas. Uschia ha il Succurs d'enviern dal Grischun pudì sa participar l'onn da gestiun passà per exempel a la finanziaziun d'ina correctura dals dents d'in uffant, ha equipà ina famiglia giuvna cun in letg d'uffants u ha regalà

ad in scolar da l'emprima classa in turnister da scola. La solidaritad da la populaziun en furma da donaziuns al succurs d'enviern sa chatta vinavant sin in bun nivel. En tut la Svizra èn vegnidas fatgas l'onn passà donaziuns da var 2,8 milliuns francs.



Da sanestra: *Monika Stämpfli*, la gestiunaria dal Succurs svizzer d'enviern, la presidenta da la regenza *Barbara Janom Steiner* e l'antieriur cusseglier federal *Samuel Schmid*.